

浙江通志

南

浙江省圖

福建界

10

江西界

西

江南界




中华书局



清雍正朝

浙江通志

10



中华书局

敕修《浙江通志》卷一百八十

人 物 六

文苑三

宁波府

三国·吴

任奕《会稽典录》：山阴朱育曰：“文章之士，立言粲盛，则有御史中丞句章任奕，各驰文檄，晔若春荣。”

五代

林鼎《十国春秋》：字焕文，本侯官人。父无隐有诗名，寓明州，鼎生于明州之大隐村。及长，谒钱武肃王，王以为观察押牙，寻辟文穆王幕府。文穆袭位，署镇海军掌书记节度判官。鼎性说正，而强记能书，得欧、虞笔法。中年读书必达曙。所聚图籍悉手钞，即残编断简，亦校讎补缀，无所厌倦。吴越国建，命掌教令，寻拜丞相，卒，谥曰贞献。有《吴江应用集》二十卷。

宋

周鐸延祐《四明志》：字廉彦，鄞人。元丰二年进士。当官桐城，辞不赴，曰：“学优则仕，吾向所治科举耳。”遂益究治六籍诸子百氏之说，悉著论其本旨。乃游颍昌访其舅范忠宣公纯仁，过洛见文潞公、司马公，咸见器重。在京师上书言徐禧永乐之失。后知南雄，以言边事忤时相，入党籍，即退休于家。作四休堂于西湖十洲之西，与弟铎偕隐。所为文二十卷，又《承宣集》一卷、《明天集》一卷、《六甲奇书》一卷。鐸娶胡氏尚书右丞宗愈之女，再娶王氏翰林学士覲之女，而妹适陈忠肃公瓘。蔡京作党籍碑，如翁甥舅俱入籍，后以

为盛事。

王璧嘉靖《宁波府志》：字子润，鄞人。宣和六年进士。少年气锐，以远大自期，悉焚前所为举子文，披阅群书，酝蓄日富，举笔为文，波澜汹涌。朝廷方复博学宏词科，首魁其选。未几卒，士论惜之。

高文虎《宋史》本传：字炳如，四明人。绍兴庚辰进士，调吴兴簿。曾几守官在吴，文虎从之游，故闻见博洽，多识典故。迁太学博士。孝宗幸两学，祭酒林光朝访文虎具仪注，文虎辑国朝以来故事授之。兼国史院编修官，与修《四朝国史》、《高宗实录》、《神宗玉牒》。自熙宁以来，史事淆杂，人无所取信，文虎尽取朱墨本刊正谬妄，一一研核。既奏御，又修《徽宗玉牒》，考订宣和、崇观以来尤为详审。历迁中书舍人兼直学士院。西掖词命，旧率以数人共一词，文虎乃人各为之。迁兵部侍郎，拜翰林学士兼文华阁学士，知建宁府。丐祠，以台臣言夺职，卒。

楼昉延祐《四明志》：字暘叔。与弟昉俱以文名。少从吕成公于婺，其文汪洋浩博，宜于议论，授引叙说，小能使之大，而统宗据要，风止水静，泊然不能以窥其涘。故其从学者凡数百人，最显者郑清之，应僊、郑次申、赵与權輩。尤善章表，李壁、黄裳为侍从，所为文俱出昉手。尝编历代文章为一编，业进士者咸诵之。守兴化军，卒。

王宗道嘉靖《宁波府志》：字与文，奉化人。嗜古学，穷渺讨幽，时出奇见，人多称之。登嘉定元年进士，为江东提刑司幹官。著有《易说指图》、《二礼说》、《书说》、《观颐悟言》、《读诗臆说》、《杂录闻见》、《因笔》、《淮盐论》并诗文五十卷。

应僊《宋史》本传：字之道，庆元府昌国人。刻志于学。嘉定十六年试南省第一，遂举进士，为教授，迁太学博士，秘书郎。请早建太子。帝问藏书，僊请访先儒解经注史，因及程迥、张根所著书，皆有益世教。帝善之。迁著作郎，历国史编修实录检讨，知台州，召直学士院。一夕召僊草麻，夜四鼓，五制皆就。帝奇其才，进翰林学士兼中书舍人，拜参知政事。乞归田里。

王应凤成化《四明郡志》：字仲仪，鄞人。与兄应麟丽讲，矻矻忘寝食，剡心文囿，根柢左氏、班、马。登文天祥榜进士。宝祐间廷对，披腹尽言，中甲科第九，赐第。或谓曰：“此丽泽先生名第也，盍以异科自见？”开庆元年，中博学宏词科，历淮西制置司参议官。未几，文天祥荐其学宜在翰墨之选，除太常

博士以终。所著有《默斋稿》及《订正三辅黄图》诸书。

薛真《两浙名贤录》：字持志，昌国人。少有文名，及长，以《圣人执权赋》领乡荐，调衡阳簿。时寇起黑风洞，檄真往抚谕。将至，有道其姓名者，其酋曰：“非四明作《圣人执权赋》之薛真耶？”遂投戈而退。

姚梦午嘉靖《宁波府志》：字正子，慈谿人。七岁学《小戴礼》，辄能言其要领。邑大夫叶汝明面试《中庸》首章义及《牧爱堂诗》、《秋水出芙蓉赋》，皆援笔立就。叶大惊异，乃大书“神童家”三字以旌之。既而，之中都，遍交当世之士，读所未见书，笔力益肆。年三十六，始发解。未五十，遽卒。黄震沫之曰：“正子起自童丱而长老先进折节相下，起一介布衣而当世知名士闻风愿交，乃不获少见于世，惜哉！”

元

姚登孙嘉靖《宁波府志》：字廷礼，慈谿人。与兄梦午皆英锐早发，人称二难。景定间，举乡贡，会宋运将讫，遂退居双峰别墅，穷究经史百氏。为文渊奥宏博，超绝蹊径，闾古作者之域。元时，起为国子助教，诸生辨疑质微，立馆下者日数百人，发葩击蒙，无不意满。赵郡苏天爵尝取其文编入《文类》。

戴表元《元史》本传：字帅初，庆元奉化州人。七岁，能古诗文，多奇语。稍长，从里师习词赋，辄弃不肯为。咸淳中，进士乙科。大德八年，拜信州教授，调婺州，以疾辞。初，表元悯宋季文章气萎荏而词骯骯，慨然以振起斯文为己任。时王应麟、舒岳祥并以文学师表一代，表元皆从受业焉。故其学博而肆，其文清深雅洁，化陈腐为神奇，蓄而后发，间事摹画，而隅角不用。至元、大德间，东南以文章大家名重一时者，惟表元而已。其门人最知名者曰袁桷。

袁桷《元史》本传：字伯长，庆元鄞人。举茂才异等。大德初，为翰林国史院检阅官。时初建南郊，桷进十议，礼官推其博，多采用之。升应奉翰林文字同知制诰兼国史编修官，请购求宋、辽、金三史遗书。累官翰林直学士、知制诰，同修国史。至治元年，迁侍讲学士。泰定初，辞归。桷在词林，朝廷制策、勅臣碑铭多出其手。所著有《易说》、《春秋说》、《清容居士集》。

董复礼黄潜《董复礼墓志》：字秉彝，奉化州人。少嗜书，不以贫辍其学，故衣败絮无以御寒，拥被挟策坐竟日，莫见有不堪之色。尝为举子业，试

有司不利，遂不复践场屋，益取经史百氏之言，钩微撷隐，而求极其根柢。间出为歌诗杂文，皆清丽古雅可喜。侍讲学士袁公楠甚器重之。

黄玠弘治《湖州府志》：字伯成，慈谿人，震曾孙。清苦力学，无所不通。周游西湖，乐吴兴山水，因卜居弁山，与赵文敏游，文敏称许之。有《卞山集》、《知非稿》、《唐诗选纂》、《韵录》等书行世。

郑芳叔嘉靖《宁波府志》：字德仲，鄞人。宋亡，遍游遗老之门，博学广记。家贫无书，尝假人书，躬自缮录，积数十百卷。为文一根于理，不事浮靡。从游尝数十人。两任郡学训，敦厚严重，以道自尊，而尤笃于伦理。晚署学录，未上，卒。

顾润嘉靖《宁波府志》：字德辉，鄞人。大父应春，父叔川，皆以文名。润六岁即善属文，郡博士俞希器欲以神童举，不果。既长，肆力经传，卓然欲以事功自见，闭门却扫，默索精思垂三十年。著《释图》一，《说约》六十三，《图征》二十一，《希言》二十四，《事刻》六十二，《治要》十八，《体卦》八，《解》八，《辨》十二，《议》二十四，《传》七，《记论》、《序文》、《铭》各三，《杂著》十八，《赋骚》十九，《杂诗》三百二十，合三十卷。

王厚孙嘉靖《宁波府志》：字叔载，尚书应麟孙。十岁能诗赋，操笔立就。父昌世，入元弗仕。游其门者多老成博雅之士，厚孙日侍左右，面命心传，克积淹博。金华黄潜荐司郡训，寻为郡直学。秩满，授象山教谕，调浦江，解归。自号遂初老人。性介洁，为文法三代两汉，不事雕饰。有《遂初集》三十卷。

姚应凤《两浙名贤录》：字时和，慈谿人。以才自雄，为文喜驰骋，每属笔，于广众中词锋横逸，一座皆惊。后持以谒袁楠，楠告之曰：“子文不受束缚，然法度不可废也。”领之。自是务为庄重简严，日益深邃。至元间，就试省部，以《龙虎台》命题，有司得应凤赋，叹曰：“此楚汉故物也。”擢置高第。著有《纳轩稿》若干卷。

陈子翬成化《四明郡志》：字象贤，奉化人。负气幹，精文章，书法李邕。为庆元路教谕。后归，日与高桥章垒、甬东郑奕夫、剡源徐木原相问难。经生学士争受业焉。每风晨月夕，载酒溪山，更唱迭和，以发抒怀抱。著有《思剡集》。

袁士元《元诗选传》：字彦章，鄞人。德祐忠臣鏞之孙。性至孝，父背患

疽，吮之立愈。以茂才授县学教谕，调鄂山书院山长，寻为平江路学教授。擢翰林国史馆检阅官，不赴。筑城西别墅，种菊数百本，自号菊村学者。所著《林外集》七卷，危太朴为之序，称其思致高远云。

文质《元诗选传》：字学古，甬东人，居吴之娄江。学行卓然，词章奇放，好为长吉体。酒酣长歌，声若金石，为杨铁崖所称。年九十六卒。

陈桎嘉靖《宁波府志》：字子经，奉化人。官至翰林学士。祖著，宋时知台州，尝本《纲目》撰书以纪历代之统。桎自束发受书，即思弘前业，乃续成二百卷，上自盘古，逮高辛，讫于有宋，比事、较义、纪年，师司马公补遗，书法师朱文公《纲目》，名曰《通鉴续编》，行于世。

明

乌斯道《静志居诗话》：字继善，慈谿人。明初，以荐起，知石龙县，调永新，以疾去官。与兄本良，字性善并著才名，乡人目性善为春风先生，继善为春草先生。宋濂称其文云：“俊洁如明月珠，汹涌如春江涛。”杨子器称其诗云：“疏秀若雨后春山，绮丽若云中翠巘。”有《秋吟稿》、《春草斋集》。

崔植成化《四明郡志》：字斯立，鄞人。治《春秋》，辨论“三传”得失，历如指掌。究极群史，出入班、马、范、欧，叩之渊乎无畔岸。平居仪度整肃，不假修饰，而规范自然。洪武七年荐为郡学教授，调处州。教后进尽出底蕴，随其才而成就之。卒官。有杂著文集若干卷。

王宾嘉靖《宁波府志》：字用宾，鄞人。博学强记，贯穿经史百家，避地村疃，淡然自适，号水邨隐者。洪武中以文学荐，授休宁教谕，以身率诸生，士不恁而自劝。秩满考绩，廷试《钟山雨霁赋》及《秦鹤赋》，上奇之，命供奉翰林，以老辞，教授浔州。卒，门人私谥曰清节先生。所著有《书隐》、《西上南游》等集。

余伯熊天启《慈谿县志》：名梦祥，以字行。性落落不与流俗伍，家贫好学，寒暑不懈，以词翰闻于时。洪武十六年举明经，授宜都知县，调饶州之安仁。所至有声。

胡广成化《四明郡志》：字文刚，鄞人。从乡先生胡世佐授《毛诗》，讨论校讎，问学渊博。敦行谊，遣纷华，为文冲淡纯雅，工律诗，文士过从无虚日。洪武中，司训邑庠，后调四川之安岳县。归里，优游山水，寓物写意，自谓乾坤

腐儒。所著有《云屋集》。

时铭嘉靖《宁波府志》：字季照，以字行，慈谿人。好学能诗，渔猎经史，为文奇正间出，变化不穷。洪武二十九年，为鄞学训导。已而赴京，和御制《思得人》诗，上奖谕，召对，特授监察御史。未几，为崇仁令，有政绩。历升四川按察僉事。尝梦苍颜缟衣人授以墨，文思益进，因号所著诗文为《梦墨稿》行于世。

王毓嘉靖《宁波府志》：字用贤，鄞人。貌清癯，读书以古人自淑。尝植梅庭下，虽凝阴沍寒，默坐对之不去，因寄之模写，标格劲瘦，天机呈露，赋诗尤工于长歌，隶书亦有新意。时称三绝。

周陞天启《慈谿县志》：字孟襄。居市廛，一室如舟，所储书史之外无他物，因号书舫斋。为诗歌音调高古，不类今人。每遇酒酣，击节歌陶渊明诗，四顾慷慨，旁若无人。

钱珏嘉靖《宁波府志》：慈谿人。不慕荣利，虽独处宴室，不废冠履，容止瞻望，未尝倾侧。遇天日清美，辄游里闲间，步履有循，仪观整肃，不问皆知为溪云先生也。性好吟咏，口吃若不能言。为诗清丽雄浑，得少陵家法。有《和唐音》并《溪云稿》行世。

郑复言、郑雍言嘉靖《宁波府志》：复言，鄞人。永乐丙戌进士，选庶吉士，读中秘书，钩纂精微，预修《永乐大典》。应制赋《白鹿》称旨，改礼部主事，历升太仆少卿。引年归。弟雍言，举进士，改庶吉士，授中书舍人。仁宗监国，屡命赋诗，顷刻立就。寻命署礼部尚宝司及六科事。上嘉曰：“不独文词典雅，作字亦端楷严密，甚类其为人。”升河南按察僉事。宣宗御极，留直文华殿，日备顾问。终太常少卿。

桂宗儒天启《慈谿县志》：字文藪。以贡与修《永乐大典》。授蕲州同知，有善政。不能迎合监司，遂注下考。吏部侍郎师逵以善诗工书荐，召见，拜修撰。居职七年，每应制有作，为时所称。

桂璫嘉靖《宁波府志》：字怀英，慈谿人。倜傥不群，至老不释卷，诗文充牣。士大夫及门请益者无虚日，相语不以名氏，尊之曰古香先生。所著有《桑榆稿》。

刘本天启《慈谿县志》：字维源。永乐丙戌进士。先是，成祖选曾染诸人肄业文渊阁，上时至阁中，或召至便殿，搜奇书僻事，以验所学，于时榜选十

一人，本与焉。同修《永乐大典》，校讎文渊阁。一日忤旨，发口外为民。寻召还为编修，以疾卒。

冯厚嘉靖《宁波府志》：字良载，慈谿人。生三月而孤。比长，事母至孝。举明经，授学官，历迁淮王府长史。尝集《文翰类选大成》，凡一百六十三卷，以资启沃。善诗文，多著述，有《洪庵稿》、《中都稿》、《南阳稿》、《测蠡管见》、《春秋卑论》等书。

周翰嘉靖《宁波府志》：字维翰，鄞人。永乐三年举人。车驾临太学，翰献赋称旨，诏礼部覆试，擢第一，命进学翰林，预修《永乐大典》。七年，除翰林典籍。先是，文渊阁所储古今书籍，岁久卷帙淆乱，翰为理葺，余二载，秩然完整，各书要旨，略能记忆。升检讨，修两朝实录，书垂成而卒。翰为文根柢班、扬，出入韩、柳，下笔顷刻千言。有集藏于家。

叶铭臻《两浙名贤录》：字维新，慈谿人。永乐甲申进士，以文名，诗有盛唐风格，每为举主解缚所称。韩王请为伴读，王改国于凉，遂归。郑路来守郡，造庐求见，坚谢不出。珞曰：“来求作府堂记耳，何拒之深也。”乃出见，欢如平生。延至郡斋，援笔为记，珞叹服。居家动遵礼法，不威而肃，士大夫语家法之善者，以铭臻称首。

顾慤嘉靖《宁波府志》：字存诚。司谏道之子。少聪警，于书无所不读。仁宗念司谏旧德，诏起之。挟装上京师，进谒藩臣，不与均礼，意其中未必有也，指所坐听事曰：“堂名紫薇，请记之。”趣具楮墨。慤展纸濡毫，顷刻立就，文不更草，书体数家俱备。乃叹曰：“奇才也！”以上客礼之。陛见，擢司经正字。性亢直，不能随时俯仰，忌者劾之，谪戍南丹。在戍，发为诗歌，沈郁顿挫，得柳柳州风致。卒年二十九。有《充然子集》。

魏偁嘉靖《宁波府志》：字达卿，慈谿人。由贡上春官，廷试第一，授石城训导。为诗希唐风，恒以立言自许，时与学士杨守阯相唱和，守阯甚器重之。平生不见疾言遽色，至利诱势怵，则屹然山立，不可动。所著有《经书仅悟》、《核充子》、《茶余诗话》、《闻见类纂》、《小史》、《云松诗略》、《读史编》。

洪常《甬上耆旧传》：字子经，鄞人。博学强记。家贫，尝从人借书，一览便尽。中进士，授兵部主事。会土木之变，于谦进尚书，一时军事势错，尽以相属。谦每入朝，常辄具笔札以从，事至，且语且疏，即不具草立上。稍迁至郎中。英宗复辟，吏指常为谦党，上特原之。后马昂为尚书，值西陲多事，

昂常面陈部曹乏人。上顾问：“洪常安在？”以忧去对，即令起复。至部久之，疏荐常为本部侍郎。忌者劾昂私所属，常遂请疾归里。萧然一室，以文章自命。晚年得所未见书，必手钞之。所著有《勉学录》、《石田稿》、《随笔考》、《文业考》及选定六家文集。

张琦嘉靖《宁波府志》：字廷珍，慈谿人。读书一过不忘，作文有俊才。正统辛酉中乡试，时犹未冠也。试礼部不利，益自奋于学，文气浩瀚，如峡江春流，不可抵御。时海盐张宁、余姚魏瀚、嘉兴姚绶俱有名于时，人称浙江四子。天顺登第，未几卒。

王淮《列朝诗集传》：字柏原，慈谿人。“景泰十子”之一。长身美髯，博极群书。尝与汤公让遇于吴兴之慈感寺，以辨博相夸，对语移日，不相下。及征青陵台事，各得其二，淮问公让曰：“止于此乎？”复举其一，历历口诵无所遗，公让叹服，语太守岳璿曰：“柏原真行秘书也。”好作长歌，下笔辄数十韵，造语奇丽，擅名江湖间。卒年八十。著有《大槐稿》。

罗信佳《两浙名贤录》：字邦彦，慈谿人。尝与同邑桂琛、郑岑、冯璋、时中读书永明僧舍，四人读穷昼夜，一灯聚首，每至夜分。信佳独鼾睡达旦。及举所读，背诵如流水。至讲解经传，四人纷拿未定，信佳卧其旁，徐以一言决之。景泰庚午，与四人同领乡荐。大理丞夏时正题其读书处曰聚奎堂，为文记之。成化丙戌，登进士，除南兵部主事。未几卒。信佳文字简严，人谓似李泰伯。

王暘天启《慈谿悬志》：字时晖。风韵凝远，读书不务章句，搜剔幽微，至关彝伦世故，必反覆详至，务趋深厚。为文于闲肆中出奇怪，耻作软媚语。正统丁卯，举乡试，五上春官不利，乃作《五葵赋》以见志。时宰以其工楷法，荐授中书，命下而卒。

张琦《列朝诗集传》：字君玉，鄞人。弱冠游学吴楚间，每读书至夜分，与其徒吸水噉面，醒则又读。弘治戊午举于乡，明年第进士，年已及艾，授南大理评事，历寺正，升兴化知府、监司。累上治状，以疾请归。升左参政，致仕，二十年而卒。自少至老，刻意攻诗，呕心琢肾，力去陈言。有《白斋集》十卷。

陈沂《列朝诗集传》：字鲁南，鄞人，以医籍居南京。八岁能摹古人画，十岁能诗，十二岁作《赤宝山赋》，传诵人口。中正德丁丑进士，改庶吉士，授

编修，进侍讲。忤张孚敬，出为江西参议，山东参政，转行太仆卿，致仕，杜门著书，绝意世务。书学大苏，旁及篆隶；绘事皆称能品。所至好游名山水，皆有诗纪。晚与顾华玉游历长干诸寺，赋咏尤多，文采照映一时。有《拘虚诗集》及诗话若干卷。

章珍《甬上耆旧传》：字文重，鄞人。自天顺、成化以来，与张景心、宋弘之、李栎轩俱以布衣宿望为里中《五经》师。书法仿宋克，诗溯汉魏，能造其妙。生平喜读《易》，有《易注》若干卷。又《孤舟夜读》一卷，他所著《句章小家言》二十卷。

洪贯嘉靖《宁波府志》：字维卿，鄞人。举成化丁酉乡试，除郑州教谕。肆力为古文词，诗逼盛唐，赋有楚汉风格。升知崇化县，改政和。邑有紫阳西山遗迹，贯因表章发挥，以经学风厉多士，士彬彬起，然竟得下考以归。因拟杜《秋兴》诗见志，传至京师，李东阳大加赏异，别为《春兴》八首以遥和之。晚结庐东野，更号稼翁，日哦其间，取唐人诗和之殆遍。或巧铭志谱牒，以为时重。海宁、新城、江阴、靖江四邑志皆其论撰也。年九十卒。有《周易解疑》、《卧游清啸录》、《太白山人稿》五十余卷。

金湜《甬上耆旧传》：字本清，鄞人。童时辄能诗，长益渔猎载籍。举于乡，以善书授中书舍人，迁太仆寺丞，督山东河南马政。宣诏朝鲜，其国尚文学，闻湜有诗名，请留词翰，为即席草答数十首，文义溢发，自王以下尽惊曰：“前此所未有也！”因请其使节所历诗文镌诸国中，名曰《皇华集》。使还，致仕家居，与里中耆旧觞咏为乐。诗多逸韵，篆、隶、行、草俱有汉晋人风骨。善写竹，每命笔，姿态横生，率题小诗于上。

吴惠嘉靖《宁波府志》：字仁甫，鄞人。少孤。习记诵；为词章，即越流辈。正德辛未成进士，改庶吉士，授检讨，升国子司业。日会六馆生讲经书奥义，人喜得师。嘉靖初，侍经筵日讲，历太常寺卿，卒。惠自少熟苏长公文，濡毫染翰，每相肖，李东阳、杨一清常以“东坡”称之，惠亦以此自许。或讥其不能进于古，惠曰：“经生学士如好古者，且就左氏、司马读之，何暇及我乎！”其文自成一家言。在太学，有《经筵讲义》，别有《北川文集》。

华爰嘉靖《宁波府志》：字仁卿，鄞人。甫成童，博闻强志。正德甲戌成进士，历南兵部职方郎，出守桂林，有勋绩。以直道忤人，被劾落职。性温雅，洞见肺腑。家居日以诗书自娱，兴至，辄携其所知夷犹于回溪叠嶂间，见云蒸

雾变,木秀卉荣,则欣然忘返。工行草,为诗希盛唐风格,每以王维、杜甫为至。所著有《石窗集》。

陆鉞《两浙名贤录》:字举之,鄞人。正德庚辰进士,廷试第二,官编修,读书中秘,益锐志问学,尽览经史百家言。尤砥名节,以古人自期。预修《武皇实录》成,进修撰。以议礼忤时相,遂出为湖广金事,转山东副使,督学政,敦本抑末,士风为之一变。山东旧无通志,叹曰:“海岱山川之宗,圣贤人物之望,《六经》文章之祖,惟兹一方之志而天下古今之事备焉。吾当任兹役。”遂考古渎今,补遗正讹,穷日夕不懈,逾年,志成而病卒。鉞为文奥衍宏畅,诗则温而典,婉而讽,有晋唐之风。著有《少石子集》十三卷。

李端嘉靖《宁波府志》:字文正,鄞人。与二弟同龔至老。诸子十人,各课耕读。郡太守礼为乡校师,规诲整肃。为诗逼唐人,时与金太仆湜、倪处士光、魏学博偕缔为诗社。日本贡使还,求端诗为赠,有“肩挑云影江头别,衣带天香海上还”之句,人传诵之。

张鈇天启《慈谿县志》:字子威。博综百家,再试场屋不第,遂弃去。攻诗古文,哆口论天下事,亹亹竟日。闻人之善,虽远必赴,亦有接里闾而不通往来者。燕居独处,必正襟危坐,高风逸韵,傲睨物表。所著有《碧溪诗集》、《南阜诗话》、《郭外农谈》、《咏史百绝》等稿。

方诏天启《慈谿县志》:邑诸生。综博古今,尝著《明四都赋》,贍而核,秀而葩,走献阙下。相国袁炜,其故交也,投谒,自居揖客,名称不改其旧,袁目为狂客,赋不果上。东还,绝意世事,著述益富。

应云鸞嘉靖《宁波府志》:字瑞伯,象山人。少诣父读书处,见坟典浩博,辄曰:“会须读尽此书。”父奇之。长,遂刻意淬厉,六经子史,无不淹贯。嘉靖辛丑成进士,出令临川,设“三条法”以清虚课,上之巡抚,为时成式。筑文昌堰,疏千金陂,议设巡司,政绩炳著。历升武库司郎中。时有边警,数议征讨防御之计,方欲柄用而卒。云鸞好古文词,凡所撰著,悉本六经而步武迁、固,唐宋以下,弗屑也。所著有《临川集》、《东塘轂音》、《象川杂稿》。

张时彻《甬上耆旧传》:字维静,鄞人。二十举于乡,成进士,历官南曹郎,以副使督学江西,备兵临清,历官至南兵部尚书,遂归。时年齿尚茂,既不为世用,乃精思撰著,为诗古文词及他说林家言,凡数十卷。辑洪建以来名文为《文范》,撰郡志,续四明风雅。既以标格自持,益好士,家有别墅,在东皋,

曰茂屿草堂；在西皋，曰武林庄，时引客觞咏其间。

陈束《列朝诗集传》：字约之，鄞人。嘉靖己丑进士，选庶吉士，授编修，出为湖广金事，分司辰沅，迁福建提学副使，改河南，卒于官，年三十三。初，会稽董侍郎玘有爱女，不欲与凡儿婚。甬东张尚书时彻为言曰：“陈生虽起寒微，其人才足婿也。”侍郎召见之，垂髻敝衣，肤神玉映。叩之，无不响应，试之诗文，挥笔如云烟。侍郎大喜，克日为婚。既入中秘，与唐顺之、王慎中诸人刻历为古学。张、桂受上殊宠，奔走朝士，束独不往，恨之，出之外藩。稍迁视学，游更繁剧，再疏求去不得而死。唐顺之为刻其遗文，皇甫汈为序，谓为“早铸‘四杰’，晚熔‘二张’，道轸平原，晞驾康乐”云。

吕时臣《列朝诗集传》：字中父，鄞人。称诗先于沈明臣。避仇远游，历齐、梁、燕、赵间，旅寓章邱，与李伯华论诗，遂大进。至青州，客衡藩。衡庄王爱其诗，为刻《甬东野人稿》。晚客藩，藩礼之亚于谢榛。卒于河南涉县。鲁王孙中立序其诗曰：“山人鹤骨清癯，若出衣表，贞介廉洁，不妄交，不苟取，特为诸侯所重。”

戴鲸《甬上耆旧传》：字时鸣，鄞人。以进士知番禺县，历南工、刑二曹，出为江西按察金事，谪判邓州，历官福建左参议，归老于家。持操廉白，以孝友名。垂老犹好学，日坐东白楼，手一编不置。成化以后，郡志阙然，因续为搜补，考诸先辈所言，述而不断，名曰《四明志征》。又见高士宋弘之所辑《四明雅集》，因增所未备，序而传之。又合为《四明文献录》，别著《闽广集》、《东白楼稿》藏于家。

沈明臣《列朝诗集传》：字嘉则，鄞人。为博士弟子，数奇不偶。胡宗宪督师平倭，辟置幕府。宗宪豁达好士，微有酒失，善嫚骂，明臣岳岳不少阿，宗宪遥望见，为起立。尝燕将士于烂柯山，酒酣乐作，请为铙歌十章，明臣援笔立就，酹酒高吟，至“狭巷短兵相接处，杀人如草不闻声”，宗宪起，将其须曰：“沈生何雄快乃尔！”命刻石置山下。宗宪死，明臣走哭墓下，持所为谏，遍告士大夫，讼其冤。已而，挟策走湖海，往来吴楚闽粤间。年七十卒。先后歌诗行于世者，为《丰对楼诗选》，凡四千余首。

叶太叔《鄞县志》：字邦朗。工诗，沈明臣见而奇之，曰：“此今日李王孙也。”遂与定交。以其诗呈张时彻，深为赏异。有故人令吴中，邀修邑志，太叔既为辑定，独署己名。令以百金置酒为寿，欲得附名纂撰，太叔喟然曰：“著书

千载事，岂容货取。”遂束稿而行。其诗草偶有不愜，悉付诸火，既悔而追录所记忆，名《思烟集》。

汪礼约《甬上耆旧传》：字长文。中丞玉之孙，石孟山人坦之子。从学沈明臣，得其指授，由是名益重。所居曰大雷山房，人望之若三壶仙宅。坐卧一楼，楼左偏开一穴，下置容五石缸，使人键其外，每一诗成，辄手取投之投穴中，积岁缸满，家人发户出纸，好事者争取之，稍传布人间。其著作甚多，没后散失，仅存遗诗一卷，《四明游籍》一卷。

屠隆《列朝诗集传》：字纬真，一字长卿，鄞人。万历丁丑进士，除颍上知县，调青浦，升礼部郎中。隆令青浦，延接吴越间名士，青帘白舫，纵浪游浦间，以仙令自许。在郎署，益放情诗酒。罢归，纵览关塞，遨游吴越七闽间，啸傲赋诗，长篇短什，信心矢口。尝戏命两人对案分拈二题，各赋百韵，咄嗟之间，二章并就。又与人对弈，口诵诗文，此诵彼书，书不逮诵。所传《由拳》、《白榆》、《采真》、《南游》诸集，皆未曾起草之笔。

杨承鲲《甬上耆旧传》：字伯翼，鄞人。少喜读班、马二史，工诗。年十五，为诸生。沈明臣见而奇之曰：“獬儿难与争锋！”因呼为德祖，以是有重名。为人守古独行，于当世少所许可。尝与人言：“王弼州论历下，朗鉴不足，历下持诡道，所得者古人匡郭耳。”既以太学生北上，作《蓟门行》，名满京师。久之归里，于城南筑小园，啸咏其中，文章高妙，诗于五律为“长城”，善法书，遗集二种传于世。

余寅《甬上耆旧传》：字君房，改字僧杲，鄞人。儿时里师授句读，每为所屈。及壮，益喜读秦汉以前书。举进士，官水曹郎，上正风俗十事。以按察副使视学陕西，请谒一无得入。迁左参政，改山东，以忤时乞归。起福建，再乞休，加太常少卿致仕。寅性伉厉，狷然独行。既里居，擅文章之事，然耻以笔札自见，交游甚寡。年七十五卒。有农丈人集其诗，瘠而坚，质而峭绝，似其人。顾欲然自谓，于诗涉其藩，未能窥其奥，意专以古文辞上追古人也。

董大晟《鄞县志》：字扬明，博学工文，著《海曙楼赋》，渊泓得体，不滞不诡。又有《雪月风花赋》，并为世所称。

李玮《甬上耆旧传》：字伟卿，鄞人。尽读《五经》、《三史》，作有韵之文，辄得奇语。及壮游蓟门，逾年归，杜门著书，务期尽洗俗学，归于大雅。前后撰著积数十万言，独留心土风利病。尝著《国课论》、《东钱湖赋》，胪列郡国农

田水利事甚详。年逾九十,作《七适》一篇,手定诗文十余卷,曰《桑麻集》,谢三宾刻以行世。

王萱天启《慈谿县志》:字季儒。父交,为给事中,尝折权相翟璠,著直声,萱其季子也。髫髻时,即以词赋倾诸作者。万历癸未举南宫,改庶吉士,授编修,一时侪偶皆折节下之。为文意气矫厉,如惊飏蓬勃,洞駭耳目。诗如高山大壑,峰巖旷远,与屠隆相伯仲。丙戌,持节册封晋藩,报命,至潞河卒。所著有《云山日记》、《采真编》、《季儒诗选》、《商云馆全集》,并行于世。

应臬《鄞县志》:字仲鹄。为诸生,后弃去,泛舟江汉间,发为楚声。已而,上薊门,历长安,落落无所合,归而卜筑于东皋之竹苍暇,与二三隐人往来酬倡。信安方应祥、徐日久延至烂柯山,以诗文师事。留都各部寺志皆臬手裁。尝与閩中曹学佺论文,意甚合,故《石仓诗选》臬诗独多。

李垞《甬上耆旧传》:字公起,鄞人。生而聋。父尚默,卒于官,垞甫十余岁,闻讣号痛,凡五日夜,咽枯而嘶,乃更哑。及长,尽发先世遗书纵观之,上自国家典故、边场户口、名臣言行,无不得其始末,以至一器一物,靡不考据精核,作为史谱。辑甬东逸事,幽奇毕显。行世有《盟鸥集》,其未刻者十余种。曹学佺尝合华亭唐仲言为《二异人传》。仲言瞽而工诗,垞以目诵,仲言以耳读,两君诚千载异人也。

王嗣奭旧《浙江通志》:号于越,鄞人。领万历庚子乡荐,授涪州知州。少有文名,及长,博览经史,尤嗜少陵诗,尝梦与把臂共吟。后之官,入蜀,过草堂,谒少陵法像,恍然梦中,遂詮注其诗曰《杜臆》。著有《左右镜山》、《窥天》、《管天》诸笔记。

薛冈《甬上耆旧传》:字千仞,鄞人。少辟地客长安,为新进士代作考馆文字,每得与选,因有盛名。所著《天爵堂集》。身为太平词客六十年,名重天下。

汪枢《静志居诗话》:字伯机,鄞人。生世禄之家,不乐仕进,治别业曰浣园,赋《园居诗》六十首,閩人徐兴公亟称之。有《存侯篇》。

董守谕旧《浙江通志》:字次公,鄞人。负性耿介,不俯同流俗,为文章耻循常袭故。登天启甲子贤书,七上公车不第。杜门读《易》,有得即抄之,积以成帙。性不善治生,家本素封,用以待宾客,赈亲故,遂致日落。当事欲一面不可得。士论以此重之。所著有《监兰集》及《读易一抄》、《二抄》、《卦变考

略》。

冯元仲《慈谿县志》：字次牧。幼即肆力于诗古文，钩深探微。试吏部，授县丞，归隐汤山，更名天益。取前人未刻书及米、赵诸家墨迹，雕镂精好，又按古名墨法更制之，一时天益山书墨遂名天下。其后，家日落，敝衣箬笠行道中，与人评论诗文及谈黄道周、倪元璐诸遗事，往往移晷始别去。诗法杜而体兼北宋，然未尝留稿。僧寮村店颓垣败壁间，存者十一，每为人所脍炙。

陆符黄宗羲《陆符墓志》：字文虎，宁波人。貌甚伟，胸贮千卷，声誉如洪钟，一时士大夫听其谈论，皆以为陈同甫、辛幼安复出也。崇禎辛巳，以荐至京，入国学生。壬午顺天乡试。丙戌卒，年五十。符古文词鹏骞海怒，意之所极，每穿天心月胁而出。诗皆志意所寄，市交游而作声色者，未尝以片语汙其笔端。虽才堪经世，而翛然独有世外之致。

刘应期《慈谿县志》：字瑞当。为诸生，有盛名。初与姜思睿称“姜刘”。已，思睿登第，复与冯文伟称“冯、刘”。一时名士，无不愿与之交。发为诗文，僻拙类圭峰家数。

国朝

李邴嗣旧《浙江通志》：号杲堂，鄞人。自高祖循义至父纲，四世贵显。尝侍父病，呕血数斗，自此绝意人世，自甯草石，日著书。撰《汉语》、《南朝语》、《续世说新语》为“三语”，而《汉语》不列曹氏一门。其诗古文词凡一百余卷，类《汉语》。鄞人宗师之。

陈锡嘏《乡贤留祀册》：字介眉，号怡庭，鄞人。康熙乙卯领浙解，明年成进士，改庶吉士，授编修，与纂《皇舆表鉴》、《古辑览》二书。充己未会试同考官，寻予告归。《宁波府志》：锡嘏处身若冰雪，而与之处，辄平易近人。为诸生，穷日讲授，矻矻不休。官词臣，公堂馆课，私室横经，率至鸡鸣而寝。里居膺末疾，犹隐囊危坐，不释丹铅。士人将卷帙来请，必铄两其得失，终卷而后已。有集若干卷。

郑梁《绍兴府志》：字禹梅，又字寒邨，慈谿人。康熙戊辰进士，选庶吉士，改户部主事，历升郎中，甲戌会试同考，出知高州府。时议开碛川，梁谓此为鲸鲵出没导之路也，持不可。有孔道士者，欲啸聚为乱，遍揭城中，言某日贼且至。梁识其手书，一讯而伏。尝学于黄宗羲，闻戴山刘先生绪论，寓意于